

Tgi crescha e tgi patescha?

La populaziun grischuna crescha – però surtut en ils centers

RTR/FMR

■ **Il 2020 ha il chantun Grischun surpassà la marca da 200 000 abitantas ed abitants. Cunzunt las regiuns enturn ils centers Cuira e Landquart profitechan. En regiuns periferas datti dentant ina digren substanziala.** Chasas vidas, scolas che serran las portas, uniuns che na survivan betg, quai è savens la realitad en vischnancas perifericas en il Grischun. Malgrà che la populaziun grischuna crescha en general, sa vidan las valladas e vischnancas a l'ur.

Marca da 200 000

La populaziun grischuna ha cuntanschi la fin dal 2020 la marca da 200 000 abitantas ed abitants, quai mussan las cifras provisoricas da l'Uffizi federal da statistica. Il 1980 vivevan bun 161 000 persunas permanentamain en il Grischun. Quai è in augment da 19%, che saja cunzunt da contribuir a persunas che vegnan da nov ad abitar en il Grischun.

Tgi patescha...?

Cunzunt las regiuns Bernina (-6%), Surselva (-5%) sco er Engiadina Bassa/Val

Müstair (-1%) ed Alvra (-2%) han patì ils davos 20 onns (guarda grafica).

...e tgi profitecha?

Gronds victurs en la «cursa demografica» èn persunter las regiuns en la vischnanza dals centers, sco la regiun Plaun che nota in plus da bun 21% en il decurs dals davos 20 onns.

La regiun Landquart è creschida per 16%, Plessur per stgars 9%. Era dapli populaziun ch'anc il 2000 han las regiuns Viamala (+10%), Moesa (+13%) e Malögia (+4%).

GLION E LUMNEZIA

Glion gudogna – la Lumnezia perda

(rtr/fmr) «Il svilup da la vischnanca da Glion n'è betg repartì da moda eterogena sur tut sias fracziuns», di *Carmelia Maisen* che presidescha la vischnanca da Glion. Il dumber d'abitants en las fracziuns da Duin, Pitasch, Riein, Ruschein, Ladir, Siat e Pigniu è restà medem u schizunt i enavos levamain. «Nossa finamira è d'evitar quai e da tegnair il dumber d'abitants en quellas fracziuns pitschnas», declera ella, «per quels ch'èn già là, ma eir per attrair giuvnas famiglias sto vegnir mantegnida la qualitat d'infrastructura.» La citad da Glion e las fracziuns Castrisch, Sevgein, Luven, Schnaus e Rueun percunter han registrà durant quests ogt onns in augment da 400 persunas. «La vischnanca sa influenzer quel svilup mo a moda moderada», explitgescha Carmelia Maisen, «in pau ha ella pudì far quai cun metter a disposiziun terren da bajegiar, schegea che quel è limità.»

La Lumnezia ha percunter pers: Actualmain dumbra ella 120 abitants da main che avant 9 onns. Quai fa quitads a *Daniel Solèr*, il nov president. El menziuna però in'observaziun durant la pandemia corona: «Quella ha gi in effect positiv areguard il dumber d'abitants tar nus», di Solèr, ch'i saja vegnì dapli glied en Lumnezia en tschertga da ruas e solitariadad. Quai è sa mussà tar il terren da bajegiar: «Las parcelas da bajegiar han ins pudì vender uschè bain sco anc mai ed era las abitaziuns da vacanzas e las stanzas d'hotel eran bain occupadas.» Tenor Daniel Solèr è era il homeoffice in avantatg per la vallada. In recept a lunga vista encunter la digren da la populaziun n'ha el betg: «Igl è da far pass pitschens ed acceptar ch'il svilup demografic resta anc in temp ina sfida.»

PUSCHLAV

La val ha pers 500 abitants

(rtr/fmr) Ils ultims 20 onns ha il Puschlav pers radund 500 abitantas ed abitants. Surtut la quota da persunas sur 60 onns è pli auta che la media grischuna ed er nazionala. Percunter è la cifra statistica tar la generaziun da 15 en fin 44 onns fitg bassa. Uschia che la cifra d'abitantas ed abitants diminuescha e la populaziun vegn pli veglia.

In postulat inoltrà da la Partida Liberaldemocratica Valposchiavo pretenda uss mesiras concretas. Er per puspè render atractiva la val da lingua taliana per giuvens. Quels na turnan savens betg pli en lur patria.

Il nov directur da la Regiun Bernina, *Francesco Vassella* ch'è en uffizi dapi quest onn 2021, ha ditg envers RSI ch'ins ve-

glia uss evaluar las raschuns per quel trend. Quai cun dar in sguard tant vers nord en l'Engiadina, sco er vers sid, en direcziun Vuclina, nua che la problematica saja bunamain la medema.

Betg adina na tutgava il Puschlav tar ils lieus periferics. Durant il temp da reschim Grischun en la Vuclina (1512-1797) era la colliaziun sur il Pass dal Bernina ina da las pli impurtantas tranter il sid e l'administraziun en il nord da las Alps. Il «borgo» da Poschiavo quintava radund 1000 abitants ed era cun quai la segund gronda citad en il Grischun, gist suenter Cuira.

Actualmain dumbra l'entira Valposchiavo radund 4500 abitants ed abitants.

VAL MÜSTAIR

Minus 500 abitants aifer 25 onns

(rtr/fmr) Ils davos 25 onns ha la Val Müstair pers radund 500 abitantas ed abitants. Tenor la statistica da l'Uffizi per economia e turissem dal Grischun aveva la Val Müstair l'onn 1996 exact 1897 abitantas ed abitants. Oz ha la val in dumber da 1423.

La presidenta communal *Gabriella Binkert-Becchetti* vul tschertgar mesiras per franar questa depopulaziun. La vischnanca da la Val Müstair ha perquai p.ex. inserà dacurt sias plazzas vacantas, ensemen cun differentas firmas indigenas, en gasettas svizras ed era online.

Il resultat sa lascha mussar. Oravant tut per las plazzas communalas hai dà annunzias, per quellas en il sectur da gastronomia però betg. Gabriella Binkert-Bec-


chetti: «La finamira da quest'acziun era da mussar quant atractiva che la Val Müstair è sco lieu da lavurar e viver.»

La vischnanca Val Müstair vul prender a mauns la problematica. Tenor retschertgas che la presidenta communal ha apparentamain fatg tar differentas firmas indigenas è la lingua rumantscha in punct ch'ha dà da discutir. Las emprimas classas han mo rumantsch en scola. Per famiglias da la Bassa possia quai esser in problem, uschia la presidenta communal, en uffizi dapi l'entschatta 2021.

Plinavant duessi era vegnir discurti davart pussaivladads finanzialas per famiglias giuvnas sco per exempel ina reducziun tar il tschains d'abitaziuns u tar las taglias communalas.

Tge vischnancas han pers/gudagnà

(en pertschient)



La grafica mussa il svilup da la populaziun dals davos 20 onns en las vischnancas grischunas. Da remartgar spezialmain è che la digren pertutga surtut bleras vischnancas rumantschas. Per motiv da plazza mancan quatter regiuns: Landquart, Moesa, Plessur e Partenz/Tavau. L'entira survista è da chattar sin www.rtr.ch. Là èn da chattar anc autras survistas en connex cun il svilup demografic en il chantun Grischun.

GRAFICA RTR